

NADAL

Es mièjanuèch. Sus montanhas e planas
L'escur a trach son immense mantèl.
Los pastronèls, enlai, dins las cabanas
Son endormits al ras de lor tropèl.
Qué s'espandís en amont, en aval,
Qu'es aquel bruch que dins l'aire bronzina ?
Un cant joiós mònta de l'escurina
E los ecòs, pertot, cridan : "Nadal !"

Los angels

Revelhatz-vos, pastrons e pastronèlas.
Ausissètz pas ?... Zop ! Desrevelhatz-vos !
Viste, cargatz las fardas las pus bèlas,
E sens tardar quitatz vòstres motons.
Vos cal anar plan luènh dins la valòia
Ont trobaretz un establón perdut.
Quand lo veiretz, seretz totes en jòia.
Dins aquel luòc l'enfant Dieus es nascut !

Un pastre

Qu'unte bonur ! Qu'unta bona novèla !
Que nos portatz bel angèl del Senhor.
Lo cèl enfín a nautres se rapèla.
A volgut uèi nos provar son amor.
Mès. Disètz-me, per trobar la demòra
De l'enfanton, qu'unta rota prendrem ?
S'i vei pas res, e quand serem defòra,
Al mièg dels camps ai paura que nos perdem.

Un angèl

N'agetz pas lai. Podètz partir sens crença
Braves amics. La fè vos guidarà
E de sos flars una estèla lusenta
Lòng del camin vos acompanyarà.
Del fons del cèl sa clartat que tremblòta
Vos farà lum e vos indicarà
L'endrech sacrat ont poiretz faire fèsta
Al bèl pichon que vos benesirà.

Un angèl

Dins l'establón, sus un plenponh de palha,
Lo trobaretz que dormís gentament.
Un vièlh mantèl tot petaçat lo salha.
Pecaire, n'es vestit plan traçament.
El qu'es lo rei del cèl e de la tèrra
N'a pas volgut ni palais ni castèl.
A preferat naisser dins la misèra.
O vòl atal... Adorem l'eternèl !

Un pastre

La i vam ! La i vam ! Avèm cocha de veire
Aquel Jèsus vengut per nos salvar.
A nòstre amor lo pregarem de creire.
A genolhons lo volèm adorar.
Acampem-nos e metem-nos en rota.
Tot en marchent, cantem totes en cur,
Que nòstra voès mònte jusc'a la vota
Del paradís portar nòstre bonur !

Lo bèl enfant, en efèt, lo vegèron
Quand, dapasset, dins l'estable dintrèron.
Recotodet dormissiá sus un lièch
Que dins la grèpia avián fach amb un cluèch.
Marí, prèp d'el, amb Josèp velhavan.
E totes dos, lo cap baissat pregavan.
Un buòu rossèl, un polit asenon
Èran presents alai dins un canton.

Los pastres

Enfin ! Vesèm lo Sauvur qu'esperavem.
Lo que n'avián prometut d'envoïar.
Lo que dempuèi quatre mila ans soetavem.
Totes cridem plan fòrt : "Alleluia !!!"

Un angèl

Es la vertat, lor respondèt un angèl,
Vos ven portar la patz, la libertat.
Mas se volètz meritar sa loanja
Agetz totjorn la bona volontat !

Repic

Nadal ! Nadal ! Ò nuèch urosa
Qu'as vist naisser nòstre Sauvur,
Volèm d'una votz poderosa
Te cantar de tot nòstre cur !

Albert Girbal d'Espaliu - 1939